

## Tetamu Allah Di Baitul Atiq

Kita sekarang sedang berada di dalam bulan Dhu al-Hijjah, di mana pada bulan yang mulia ini seluruh umat Islam dari santero dunia datang berhimpun beramai-ramai di kota suci Makkah al-Mukarramah sebagai tetamu Allah mengabdikan diri di sisi Baitul Atiq, untuk menunaikan ibadah haji yang diwajibkan di atas setiap umat Islam yang mempunyai daya upaya dan kemampuan sebanyak sekali sahaja di sepanjang hayatnya.

Di sanalah kita dapat menyaksikan dasar demokrasi Islam yang tulen sejati, di mana kelihatan semua manusia dalam keadaan yang sama, tidak ada perbezaan di antara raja dan rakyat, kaya dan miskin, majikan dan kuli, malahan pada hari itu kesemuanya berpakaian satu, menuju ke tempat yang satu, berganding bahu melakukan ibadah memohon keredaan Allah mudah-mudahan ibadah haji dan umrah yang mereka tunaikan itu diterima oleh Tuhan dengan mendapat ganjaran pahala yang dijanjikan.

Oleh: H. Aziz al-Murshidi

### Selamat datang:

Selamat datang bulan Haji yang diberkati Tuhan. Kedatangan bulan Haji disambut dengan begitu gembira dan meriah oleh umat Islam santero dunia, terutama oleh kaum Muslimin yang sedang menunaikan ibadah haji di kota suci Islam Makkah al-Mukarramah.

Mengapa kedatangan bulan Haji disambut dengan begitu meriah sekali oleh seluruh umat Islam? Lantaran bulan ini membawa berkat, mengandungi rahmat dan membimbing umat Islam menuju ke arah perpaduan, menyusun barisan, mengembeling tenaga kerjasama yang erat.

Syiar keagungan Islam, dan semangat persatuan umat Muslimin dapat kita saksikan dengan nyata, kalau kita diberi kesempatan oleh Tuhan mengunjungi kota suci Makkah pada bulan yang mulia ini. Di sana kita dapat melihat wajah-wajah manusia yang begitu jernih berseri-seri tawaf mengelilingi Kaabah di bawah pancaran

sinaran matahari yang panas membakar dan menunaikan ibadah sembahyang berganding bahu. Semuanya ini mereka lakukan dalam keadaan bersesak-sesak, berhimpit-himpit dan bersusah payah, namun begitu tetap juga mereka lakukan dengan penuh keredaan dan kejujuran, demi semata-mata taat dan patuh menjunjung kewajiban yang difardukan Allah, demi menghormati kesucian agama dan memuliakan tempat-tempat suci Islam yang telah dipilih oleh Tuhan menjadi markas tempat lahir dan berkembang sinaran Islam menerangi ke segenap pelusuk alam jagat.

Di sisi Baitul Atiq mereka mengabdikan diri terhadap *al-Khāliq*, dengan meninggalkan segala perbuatan-perbuatan durjana dan kata-kata biadab yang tidak sesuai dilakukan di tempat yang suci itu. Mereka hanya beribadat.. Semata-mata beribadat.. Menyembah Tuhan Yang Maha Esa, Tuhan yang tidak bersekutu pada zat dan segala sifatnya dengan makhluk

yang dijadikan-Nya. Hati mereka penuh dengan perasaan takut dan takwa, jiwa mereka terang-benderang disinari cahaya iman yang tulen sejati. Firman Allah: *“wa man yu’adhdhim ḥurumāti Allāhi fahuwa khayru lahu ‘inda rabbihī wa’uḥillat lakumu al-an’āmu illa mā yutla ‘alaykum fa ijtanibū al-rijsa min al-awthāni wa ijtanibū qawla al-zūr, ḥunafā’a lillāhi ghayra mushrikāna bihi, wa man yushrik bi Allāhi fakaannamā kharra mina al-samā’i fatakhḥafuhu al-ṭayru aw tahwī bihi al-rīḥu ft makāni saḥīq. Dhalika wa man yu’adhdhim sha’ā’ira Allāhi fa innahā min taqwā al qulūb”*

Ertinya: “Barang siapa yang memuliakan kehormatan Allah (syiar agamanya), maka yang demikian itu itu<sup>1</sup> baik baginya pada sisi Tuhannya. Dan dihalalkan bagi kamu memakan daging binatang ternakan, kecuali binatang yang terlarang atas kamu (memakannya). Maka jauhilah kekotoran, iaitu berhala, serta tinggalkanlah

<sup>1</sup> Pengulangan perkataan itu.

### Tetamu Allah...

perkataan bohong (palsu), dengan tulus ikhlas kerana Allah, tiada mempersekutukan sesuatu dengan-Nya. Barang siapa yang mempersekutukan Allah seolah-olah ia jatuh dari langit, terus di sambar burung atau di terbangkan angin ke tempat yang jauh. Demikianlah keadaan (orang yang syirik), barang siapa yang menghormati syiar agama Allah, maka perbuatan itu terbitnya daripada hati yang takut kepada Allah.” (Surah al-Hajji:30-32)

### Tetamu Allah:

Setiap orang Islam yang bermusafir ke Baitullah al-Haram kerana hendak menunaikan amalan haji dan umrah, ia sudah dianggap sebagai utusan Allah yang bakal menjadi tetamu-Nya di sisi rumah suci Baitul Atiq. Seseorang yang telah diakui sebagai tetamu Allah, ia akan mendapat perlindungan dan kawalan yang serapi-rapinya dari Allah. Ia akan menerima penghormatan dan mendapat keredaan daripada-Nya. Kalau ia mengangkat tangan ke langit memohon doa meminta sesuatu dengan hati yang penuh khusyuk, doanya itu pasti akan diterima, kalau ia

meminta keampunan dengan perasaan yang penuh penyesalan atas segala dosa dan kesalahan yang telah dilakukannya di masa-masa yang lampau, maka ia pasti akan diberi keampunan. Ini adalah satu jaminan yang telah diberikan oleh Rasul Allah (S.A.W), melalui sebuah hadithnya yang diriwayatkan oleh al-Nasa’i daripada Abi Hurairah (r.a) seperti berikut:

*“An Abī Hurayrah raḍīyā Allāhu ‘anhu, inna Rasūl Allāh ṣalla Allāhu ‘alayhi wa sallam qāla: al-ḥujjāj wa al-‘ummār wa fiḍān, in da‘wahu aġabahum wa ini istaghfarūhu ghafara lahum (rawāhu al-Nasā’i)*



Sebagai sebuah badan dakwah Islam yang terbesar di Malaysia “Persekutuan Islam Malaya- Selangor pada setiap bulan tidak putus-putusnya mengadakan siri-siri majlis agama memperingati sejarah-sejarah perkembangan Islam dari sejak 13 abad yang silam. Gambar di atas menunjukkan satu majlis memperingati “Nuzul al-Qur’ān” yang telah diadakan pada bulan Ramaḍān yang lalu di Dewan Syarahan Masjid Jamek Bandar – Kuala Lumpur.

## Tetamu Allah...

Daripada Abi Hurairah (r.a.)  
Sesungguhnya Rasulullah (S.A.W)  
telah bersabda:

Maksudnya: “Orang-orang yang mengerjakan haji dan umrah itu adalah dua utusan (Allah), kalau mereka berdoa akan dikabulkan doa mereka itu dan kalau mereka meminta ampun akan diberi keampunan kepada mereka.” (Diriwayatkan oleh al-Nasa’i).

Selain daripada sifatnya sebagai utusan Allah, para jemaah haji yang setiap tahun datang mengunjungi Baitullah yang terletak di dataran bumi Makkah itu, adalah juga dianggap sebagai tetamu Allah yang diseru dan diundang khas datang ke rumah suci Baitul Atiq. Kewajipan setiap tetamu itu mestilah menghormati tempat-tempat yang dikunjunginya itu. Ia seharusnya menunaikan segala kewajiban sebagai tetamu Allah dengan cergas dan amanah, jika ia mahu dibersihkan dari segala dosa, sebagaimana bersihnya sehelai kain putih dari kekotoran. Segala tanggungjawab sebagai seorang tetamu, hendaklah dilakukannya dengan hati yang penuh jujur dan ikhlas, jika ia berkehendakkan layanan yang baik dan ingin mendapat keredaan dari Allah. Segala amalan haji – rukun dan wajibnya – mestilah dilakukan dengan bersih dan sempurna, tidak dicampur adukkan dengan perbuatan-perbuatan yang dilarang dan khurafat-khurafat palsu yang tidak ada kena mengena dengan ibadah haji dan umrah. Pekerjaan haji dan umrah yang dilakukan dengan cermat dan berhati-hati,

mengikut cara-cara yang telah diajarkan oleh Islam, ia akan mendatangkan faedah yang banyak dalam kehidupan di dunia dan akan mendapat ganjaran pahala yang besar di hari akhirat, sebagaimana yang telah disabdakan oleh Rasulullah (S.A.W):

“*An ‘Abd Allāh bin Mas‘ūd raḍiyā Allāhu ‘anhu anna Rasūl Allāh ṣalla Allāhu ‘alayhi wa sallam qāla: Tābi‘ū bayna al-ḥaj wa al-‘umrata fa innahumā yanfiyāni al-faqr wa al-dhunūb kamā yanfi al-kīru khabatha al-ḥadīd wa al-dhahabi wa al-fiqḍata wa laysa al-ḥajjatu al-mabrūrata<sup>2</sup> thawābu illā<sup>3</sup> al-junnaṭi.*” (Rawāhu al-Tirmidhī)

Maksudnya: “Daripada Abdullah bin Mas‘ud (r.a.) telah bersabda: “Kerjakanlah dengan cermat antara amalan haji dan umrah, lantaran keduanya menghindarkan kesempitan hidup dan menghapuskan dosa, seperti menghindarkan (membuang) oleh pam api akan karat-karat besi, emas dan perak. Tiadalah pembalasan bagi haji yang mabrur (diterima) itu melainkan syurga.” (Diriwayatkan oleh al-Tirmidhi).

### Membersihkan dosa:

Para jemaah haji yang membelanjakan wang mereka di samping pelayarannya yang jauh dengan bersusah payah itu, semata-mata dengan tujuan untuk mendapatkan keredhaan Allah, pahalanya akan diberikan Allah dengan berlipat ganda. Tiap-tiap satu dirham yang dibelanjakannya dalam masa ia mengerjakan ibadah haji dan umrah itu, akan diperlipat gandakan ganjaran pahalanya tujuh ratus kali ganda. Ini juga ada ditegaskan oleh Rasulullah di dalam sebuah hadithnya yang berbunyi:

“*An Buraydah raḍiyā Allāhu ‘anhu qāla: Qāla Rasūl Allāh ṣalla Allāhu ‘alayhi wa sallam: ‘al-Nafqatu fī al-ḥajj ka al-nafqatu fī sabīl Allāh, al-dirham bi sab‘a mi‘ati wa ghayruhu wa isnādahu ḥassan.*”

Maksudnya: “Daripada Buraydah (r.a.) berkata ia; telah bersabda Rasulullah ṣalla Allāhu ‘alayhi wa sallam: ‘Perbelanjaan di musim haji seperti perbelanjaan dalam urusan fī sabīl Allāh.

Satu dirham digandakan (pahalanya) menjadi tujuh ratus dirham.’” Diriwayatkan oleh Ibn Abi Syaibah dan lainnya dan isnadnya Hasan).

Jika sekiranya setiap ibadah dalam Islam itu mengandungi hikmah-hikmah yang besar dan mempunyai tujuan-tujuan yang mulia, maka haji juga adalah suatu ibadah yang mengandungi hikmah-hikmah lebih besar dan mempunyai tujuan-tujuan lebih tinggi dan mulia, lantaran peranan utama yang terkandung di dalam ibadah haji ini akan membersihkan dosa orang-orang yang mengerjakannya, menambahkan perasaan takwa dan memimpin kepada jalan kebaikan, serta merintis jalan ke arah perpaduan seluruh umat Islam.

Haji itu meskipun pada zahirnya suatu amalan yang sebahagian besar dari rukun dan wajibnya dilaksanakan dengan perantaraan anggota dan harta (wang ringgit), tetapi pada hakikatnya, ia juga adalah suatu amalan yang berdasarkan kerohanian, memerlukan kepada tenaga rohani yang teguh dan keimanan yang kuat berdasarkan rasa kesabaran yang kukuh dan konkrit menghadapi segala kepayahan dan

<sup>2</sup> Perkataan sebenarnya adalah *lilḥajji al-mabrūr*.

<sup>3</sup> Perkataan sebenarnya adalah *dūna*